

CUSSEGL GROND

Sessiun da december 2022

Dumonda Crameri concernent la realisaziun da l'Ordinaziun davart la protecziun cunter canera

Blers vitgs grischuns èn situads per lung da vias cun bler traffic gist durant la stad. Uschia passan var 40 pertschient dals totalmain 1362 kilometers vias chantunalas tras il sector entaifer il vitg respectivamain tras la zona da construcziun. Er la ruta dal San Bernardino, ch'è fitg frequentada, va tras il chantun Grischun. En ils vitgs pertutgads datti adina puspè problems cun colonnas. Quai cunzunt, cura che quest traject vegn inditgà sco alternativa al Gottard, perquai ch'il traffic stagnescha là. Il traffic che passa mintga di tras ils vitgs chaschuna natiralmain er canera ed engrevgescha pia la populaziun locala. Che la grevizza da canera regulara po avair consequenzas per la sanadad, è renconuschì generalmain. Per quest motiv fixescha l'art. 17 al. 3 e 4 da l'Ordinaziun davart la protecziun cunter canera (OPC; CS 814.41) termins, entaifer ils quals sanaziuns e mesiras da protecziun cunter la canera ston vegnir realisadas: numnadamain entaifer 15 onns suenter l'entrada en vigur da la OPC. Per realisar sanaziuns e mesiras da protecziun cunter la canera èn ils termins vegnids prolungads: per las vias naziunalas fin ils 31 da mars 2015 e per las vias principalas fin ils 31 da mars 2018. Gist perquai ch'i n'è betg pussaivel da realisar in sviament per mintga vitg, èn las sanaziuns cunter la canera fitg impurtantas per la populaziun. Sco ch'i resorta da la missiva da la Regenza al Cussegl grond, carnet nr. 10/2019-2020, 12. Rapport davart la construcziun da vias e davart il program da construcziun da vias 2021-2024, p. 644 s., è l'emprima sanaziun da las vias principalas vegnida realisada da l'onn 1990 fin l'onn 2007. Las vias da colliaziun e las vias communalas duevan vegnir sanadas fin la fin da l'onn 2022.

Sut l'aspect da questas explicaziuns drizzan las sutsegnadras ed ils sutsegnaders las suandantas dumondas a la Regenza:

1. Han pudì vegnir observads ils termins da la OPC per realisar sanaziuns e mesiras da protecziun cunter la canera per lung da las vias? Sche na, pertge betg?
2. Fin cura han pudì resp. pon vegnir realisadas tut las sanaziuns e tut las mesiras da protecziun cunter la canera tenor la OPC?
3. Vegnan fatgas regularmain controllas da la canera sin las vias, per garantir che las limitas da la OPC vegnian observadas?
4. Èn previsas segundas sanaziuns? Sche gea, cun tge mesiras e fin cura?
5. È la Regenza pronta da preschentar detagliadamain en il proxim program da construcziun da vias, tge mesiras da protecziun cunter la canera ch'èn vegnidas realisadas sin tge vias en il chantun Grischun, e d'eventualmain illustrar quai cun ina charta?

Cuira, ils 7 da december 2022

Crameri, Luzio, Della Cà, Beeli, Berther, Bettinaglio, Binkert, Bischof, Brandenburger, Brunold, Bürgi-Büchel, Censi, Collenberg, Derungs, Dürler, Epp, Föhn, Furger, Gansner, Grass, Jochum, Kohler, Lamprecht, Loepfe, Maissen, Menghini-Inauen, Michael (Donat), Morf, Natter, Perl, Righetti, Roffler, Sax, Schutz, Spagnolatti, Tanner, Tomaschett, Ulber, Wieland, Wilhelm, Zanetti (Sent), Zindel